

開放文學 – 江湖俠義 – 笏山記
第五十七回 破碣門紹主出降 迎王師晉軍奏凱

是夜，火驚更多，仍鬧得家號戶哭。可飛虎招京營將可之毅、可廣蔭，殺出阜財門，與尹百全夜戰於碣門之內。時香得功屯鴉山，於絕高處造個望樓，日夜窺眉京的動靜。見碣門軍士，吶喊自亂，互相戰鬥，即稟龍飛傳令大軍，四面一齊爬山而進。但見漫天火炬如星，炮鼓奔雷，地維俱震。百全驚惶失措，望見存存侯可嵐團，疑從天上飛來，大懼策馬向阜財門而走。嵐團追上，一鋼打翻，眾軍將百全縛了。時碣山四週的寨柵旗幟盡倒，軍無鬥志。飛虎打開碣門迎龍飛軍拜於馬前。諸將見百全已擒，大軍已入碣門，諒不可支，降者甚眾。龍飛既得碣門，將百全等四十餘人陷上囚車，連夜解往監軍營中聽君相發落。天剛明，阜財門大開，紹潛光率眾文武，囚服輿轎出降。龍飛押往監軍營見王。王使人祛其囚服，焚其輿，下座執其手曰：「朕與賢王，烏溝一會，久違眉宇矣。今以斯民之故，許朕常得相見，朕之幸也。」潛光俯伏流涕曰：「臣昧於天命，數抗王師，罪該萬死。若許自新，願攜家屬，為率土民，死無敢貳。」王笑曰：「聞暎雲、顰兩一代美人，朕後宮雖眾誰堪與比，願賢王分枕席之愛以及朕，朕必有以報賢王。」潛光伏地嗚咽不能對。花容曰：「紹王既降，正深慚赧，願王自重，無出此無賴言以相謔。」王肅然曰：「丞相之言是也，朕言過矣。」遂封潛光為多情侯。許暎雲、顰兩繼文相從。使白萬寶、寶小端及段安、黎安兩王子，先率部下軍押潛光等回紫都而去。

三月十五日，王入眉京，查點府庫軍糧，見玲瓏巢玉諸院，十分華侈，毀之，改作民居。放出宮女數百人，聽其自嫁。諸文武有不願仕者，悉放歸農。於是大犒三日。龍飛以下賜幸有差。花容奏：「眉京之民，被困三年，衣食多不給。」乃發倉粟庫銀以賑之。使龍飛暫守眉京，擇日班師。